

Sunday, February 1, 2026

Time - 2:30pm - 2:35pm

**AKASHVANI AIZAWL**  
**REGIONAL NEWS BULLETIN**  
**(MIDDAY)**



**NAUPANG LEAGUE**

Reliance Foundation leh Mizoram Football Association buatsaih, naupangte football inelna chu match 10,000 khelh tlin a lo ni ta a, he mi puala Rajiv Gandhi Stadium, Mualpuia hun tawi buatsaih chu nimin khan Sports Minister Pu Lalnghinglova Hmar in a hmanpui ani.

Pu Lalnghinglova Hmar chuan, India rama a vawi khatna ni turin Reliance Foundation chuan Mizoramah naupangte awmze neia football an zirna turin League mumal tak a kalpui niin a sawi a, he inelna Naupang League tih hi football hmasawna atan, naupang chher chhuahna atan leh discipline kenkawhna atan duhthusam a ni, a ti a, a bul tantu zinga a tel ve thei chu lawmawm a tih thu leh tuna an thlen chin chu an ngaihtuah phak piah lam a nih tawh thu a sawi.

He Naupang League hi Aizawl, Lunglei, Champhai leh Kolasib-ah te kalpui niin naupang kum 6-14 inkar awmze neia football inelna a ni a, kum 2022-a khelh tan niin a senso hi Reliance Foundation-in a tum a, Mizoram Football Association leh an hnuai District Football Association ten kalpuiin , naupangte hian kum khatah competitive match vawi 30 chuang an khel a ni.

Naupang League bakah Reliance Foundation hnuai kalpui mek Costal League-a match 10,000 khelh tlin lawmna hi MFA Honorary Secretary Pu Lalrengpuia'n a kaihuai a, MFA hruaitute, Reliance Foundation Young Champs aiawhte,leh player te bakah naupang nu leh pate an tel a a. Naupang League hnuai hian District paliah naupang 3,500 chuang an awm mek ani.



## **PRO PASTOR**

January ni 27 atanga ni 30, chhunga Synod Conference Centre, Aizawl Mission Venga Pro. Pastor Orientation Programme buatsaih chu Zirtawpni khar a ni.

Orientation programme hi Thawhlehi zan khar hawnna inkhawm buatsaih niin Synod Moderator, Rev. John Raldosanga hnen atangin inlawmna leh Keynote Address ngaihthlak a ni a. Orientation chung hian subject hrang hrang – kohhran inrelbawlna chungchang te, Pathian Biak Inkhawm chungchang te, Social Media hman chungchang te, Synod sum vawn dan chungchang te, Synod dan leh hrai chungchang te leh rawngbawlna atana tangkai tur thupui hrang hrang mithiamte'n an zirtir a . Zirtawpni zan khar OM te nen inkawm ho a nih hnu-ah Orientation programme hi khar a ni.

Tun tum Orientation programme-ah hian Pro. Pastor 16 an tel a, Mission Field hnuai Pro. Pastor-te chu Field Secretary kaihhrainain anmahni huam chhungah Orientation an nei thung a ni. Pro. Pastor Orientation hi Pro. Pastor lak thar te tan kum tina buatsaih thin a ni.



### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin tlai dar 6 leh a chanve-ah Chanchinthar puan leh a ni ang.



### **CHAMPHAI PWD**

Champhai khawpui chhunga hmasawna ruhrel, Sawrkar building hrang hrang sak hna thawktute tun hnai a tlawhtu, Pu PWD, Chief Engineer, Hrangthanga Zote (Building) chuan an hnate tha taka thawk tur leh hunbi tiam chhunga an hna thawh zawh tum turin a hriattir.

Pu Hrangthanga Zote chuan Champhai District Court building, Champhai Vengsang a mi, Champhai Auditorium building, Bethel Veng a mi, Working

Women Hostel, Champhai Vengsang a mi, Settlement Officer (Revenue) Office building, New Champhai a mi, Urban Primary Health Centre building, Vengthar a mi leh Champhai District Hospital kianga Emergency Critical Care Block te tlawhin hnathawktute hmalak dan uluk takin a enfiah a. Sum tam tak senga Sawrkarin hmasawna tur In a sak te chu a nihna tur ang taka zawhfel a nih theihna tura hma la turin Contractor te chu a hriattir a ni. Hetih lai hian He'ng building sak mek zingah hian a tam zawk chu hunbi tiamsa-ah an zo hman dawn lo niin thu dawn a ni.

**(Lahlupua, PTC Champhai)**



### **LADC AUSTERITY**

Nikum chawhnu lama Lai Autonomous District Council (LADC) hnuai a muster roll lak zawng zawngte chu vawiin atangin chawlhthir vek an ni dawn.

LADC a sum leh pai dinhmun vawnga viltu 'Finance Department' in a zirchianna leh a rawtna angin LADC ah sum dehchhuah (Revenue inflow) leh senral inbuk tawklo avangin kawng hrang hrangin inremchen a tul thu tarlan a ni a. Hei vang hian nikum September ni 1 atanga December ni 11 inkara Muster Roll a hna lak zawng zawngte chu, vawiin February ni 1 atangin chawlhthir vek an nih tur thu LADC Executive Secretary thupek chuan a tarlang. Tun tum LADC inkhawmah khan sorkarna chelh hlim leh eptu lam hruaituten inrenchem pawimawhzia leh council inrelbawlna atana sum hmuh belh pawimawhzia uar takin an sawi chhuak hlawm a. Tun dinhmunah council hnuai a hnathawk an thahnem hle tihte sawi chhuakin hnathawkte hlawh atan sum a kal tam avangin hmasawna hnathawhna tur sum a awm mang lo an ti a. Sorkar thar chuan huai taka thutlukna a siam ngam tul an tih thu an sawi bawh a ni.

Autonomous district council 3-ah te hian council hnuai a thawk leh council budget atanga hlawh la an tam hle ni a sawi a ni a. Rorellai party-in vote zawna leh insawhnghehna atan an hmang thin ni a puh an ni bawh. Thenkhat sawi dan chuan council hnuai a hnathawkte hian pisa kai kim se chuan thutna an indaih lovang tih an sawi hial a. Council sum ei hektu ber niin council thenkhatah chuan budget pumpui za zela 90 chuang hlawh atan sen a nih thu an sawi a ni.

**(Desk)**

